

歐陽修


全集

居士集卷第一 全集一

古詩三十八首

顏跖

顏回飲瓢水陋巷臥曲肱
命跖壽死免兵愚夫仰天
無形萬世尚遭戮筆誅甚



欧阳永叔 著

歐陽修全集

下

中國書局

表奏書啓四六集

卷一

諫院謝賜章服表同王素 慶曆三年九月

臣某等。今月日。準閣門告報。奉聖旨。來日改賜章服者。臣等尋以列狀。具言供職以來。未有能效。不敢卽受。乞賜停寢。明日朝于垂拱。退立廡下。俟命不報。方共彷徨。未知進退。而閣門吏已迫臣等入對。及見於延和。有司贊使俯伏受命。臣等不勝惶恐。趨出以辭。伏蒙遣中使宣諭。云出自宸衷。並不因臣寮薦舉。不得辭讓。臣等知君命甚寵。不可必讓。因退而拜受。俯伏之際。竦動羣臣。伏惟陛下聖德仁慈。優容臣下。凡有上殿者。多因事陳述。自乞章服。故陛下不因臣等奏事之時。特召賜見。又宣明命。告以出自宸衷。蓋不欲使臣等雷同徵幸之流。而爲外人譏議。乃知陛下愛惜臣等。至於如此。臣等愛君憂國之勤。自宜如何。伏惟天地之恩。無物可稱。欲伸報謝。惟有至誠。今陛下以一章服賜臣等。尙不欲令外人所非。伏況陛下上承社稷之重。下制元元休戚之命。舉動得失。所繫者大。則臣等固當事無大小。一一規正。致陛下纖過小失。不見于外。然後可以稱臣等報君之心。如陛下所以愛惜臣等之意。臣等無任。

辭召試知制誥劉子慶曆三年十二月

臣今早準中書傳指揮令臣到聚廳處。尋問得有聖旨。令臣就試。伏念臣自忝諫垣。言事無狀。日月未久。恩澤已頻。凡朝廷任用非人。僥倖干進。在於臣職。皆所當言。豈有自爲僥倖以冒榮寵。其召試指揮。伏乞特賜追寢。取進止。

辭召試知制誥狀同前

臣今日準中書召臣。聞有聖語。令臣就試。已曾略具劉子辭免。退而循省。未止憂驚。伏念臣本乏才能。豈堪作用。

誨蒙聖獎。擢在諫垣。竊自思惟。無以論報。但竭愚慮。知無不爲。凡姦邪在朝。僥倖求進。多以激訐沽名。未察臣心。紛然讒誚。臣亦自省忠國之節。特惟陛下知之。而可畏之言。何由悉辨。但誓不敢干進。庶幾久乃自明。今若驟覓寵榮。越次升用。則是讒議者謂臣向之所爲。果是沽激。本非爲國而去惡。但務傾人而進身。不惟使今後朝廷。擢用忠信之臣。不以自明而取信。兼恐小人見言者得進既速。則各務奔趨。一長其風。遂成踰弊。蓋上千於國體。非止徇於臣私。況臣供職未久。言效無聞。方今百度未脩。四夷多事。言者正當以失職坐黜。豈可以亡狀遽遷其召試之命。必望特賜追寢。緣臣早來。爲中書催召。倉卒之際。論述未詳。謹再具狀奏聞。

辭直除知制誥狀同前

今月六日。準中書召臣試。尋曾具劄子。并奏狀辭免。今日忽聞已有聖旨。更不召試。直除知制誥者。伏以聖恩優異。至寵至榮。臣所以敢茲懇請者。蓋以上繫朝廷任人之體。非專臣子飾讓之私。唯冀聖明。察臣悃愾。竊以朝廷進用臣下。患忠邪不分。欲辨忠邪。須覈情僞。今一言事之臣得速進。則小人好進紛然。爭以口舌爲事。至其甚弊。理難抑絕。則後來有讜言之士。必雷同以干進見疑。使君子小人。情僞何別。故臣以謂任人之體。惟言事者不可以速冒寵榮。臣累得對便殿。奏事之際。常陳此說。伏況臣供職已來。日月未久。幸值陛下切於求理。優容直言。然而夷狄未賓。盜賊未息。官吏未汰。黎民未蘇。以事考言。其效安在。而數月之內。恩典頻仍。當黜而升。宜罰而賞。繫於國體。則如前所陳。揣於臣私。則自知若此。且夫設官賦祿。本以勸善。擢臣一人。好進者得以奔趨。無勞者皆容忝冒。所損已多。伏望聖慈。憫臣愚訥。直降恩命。特賜寢停。

辭免第二狀同前

昨以準中書劄子。爲臣累辭恩命。奉聖旨不得辭讓者。伏以臣之事君。有誠無飾。若理必當受。則豈敢虛辭。上煩聖聰。自陷矯詐。蓋臣所陳述者。上繫朝廷事體。非獨專徇臣私。如臣之愚。本以言事者速進。則僞言者誘以爭趨。今若辭讓而不獲。則僞讓者終於得進。損之又損。不如不辭。臣猥以非材。已在言責。若陛下欲擢臣以責效。則今

所居之職。自足展效。但慮無能。若以寵典爲賞勞。又無可賞。伏況此來恩命。特出聖心。臣子至榮。人所願得。苟非深思熟慮。理須避讓。豈敢固自稽遲。以干典憲。伏望聖慈。察臣至誠。至懇。所除誥勅。早賜追遞。

舉呂溱自代狀同前

準先降勅節文。應兩省臺官尙書六品已上。諸司四品已上。授官訖。具表讓一人自代。於閣門投下方得入謝者。右臣伏見著作郎直集賢院知蘇州呂溱。首登辭科。素有文學。不肯碌碌。以希例進。請補外郡。躬勤政事。今蘇州治狀。爲兩浙第一。臣嘗與溱同在館閣。聞其論議。服其度量。材美甚衆。非臣所如。擢以代臣。庶允公議。謹具狀奏。舉以聞。

謝知制誥表同前

臣某言。伏奉制命。蒙恩特授臣右正言知制誥者。伏以王者尊居萬民之上。而誠意能與下通。奄有四海之大。而惠澤得以徧及者。得非號令告詔發揮而已哉。然其爲言也。質而不文。則不足以行遠。而昭聖謨。一作謀。麗而不典。則不足以示後。而爲世法。居是職者。古難其人。乃以愚臣而當此選。臣某中謝。伏惟尊號皇帝陛下。茂仁聖之姿。荷祖宗之業。日慎一日。曾未少懈。而自羌夷負固。邊鄙用師。勤儉率先於聖躬。焦勞常見於玉色。雖有憂民之志。而億姓未蘇。雖有欲治之心。而羣臣未副。故每進一善。則未嘗不欲勸天下之能。每官一賢。則未始不欲盡人材之用。雖以爵祿而砥礪。尙須訓誡之丁寧。尤假能言。以諭至意。可稱是者。不又一作大。艱歟。伏念臣雖以儒術進身。本無辭藝可取。徒值擢者時文之弊。偶能獨守好古之勤。志欲去於雕華。文反成於樸鄙。本懼不適當世之用。敢期自結聖主之知。陛下獎之特深。用之太過。此臣所以懇讓三四。至於辭窮。而天意不回。寵命難止。尙慮頑然之未諭。更加使者以臨門。恩出非常。理難屢屢。及俯而受命。伏讀訓辭。則有必能復古之言。然後益知所責之重。夙夜惶惑。未知所措。伏況文字之職。廁于侍從之班。在於周行。是爲超擢。不徒揮翰以爲效。自當死節以報恩。惟所使之。期於盡瘁。

龍圖閣直學士河北都轉運使謝上表關 慶曆四年八月

謝獎諭編次三朝故事表慶曆四年九月

臣脩言。今月二十八日。進奏院遞到詔書一道。以臣前奉詔編次三朝故事。成上進訖。特賜獎諭者。聖后當天。孝循先志。嘉與左右。奉爲大法。成編上聞。懼不稱旨。蒙詔溫諭。以榮以悖。臣某中謝。臣聞藝祖造邦。翕受駭命。文綬武服。震響萬方。十七年間。大業以定。神宗享御。睿謀獨斷。照姦以察。固賢以誠。政清法明。夷夏安樂。章聖紹衣。上下。錯國旣安。玉帛走於庭。犀革棄於庫。刑賞有典。禮樂有經。草木人靈。罔懋歡喜。恭惟皇帝陛下。以甚盛之德。位久大之業。日旰坐朝。昧爽思道。置器安處。納民大中。尙惟一租二宗之遠謨。有百世無疆之丕訓。君臣所以固附。天人所以調諧。法令所以必行。邦國所以從乂。天垂日皎。布在方冊。爰詔近侍。探撫要實。祕在大府。用禪聖政。蓋守成念夫至艱。孝者先乎善繼。睿心遠紹。振古與偕。臣親被上音。適終論次。慮失煩簡。隕越待罪。聖度兼貸。錫以褒言。誓捐微軀。仰荷鴻覆。瞻望宸辰。無任激切。

謝賜慶曆五年曆日表

伏以聖人在上。天地節。陰陽和。一日十二辰。五星二十八舍。皆安次而行。四時八風六律二十四氣。各應時而至。臣愚幸同萬物。俱被長育。而得與草木自別。使知寒暑之期。臣某中謝。伏惟尊號皇帝陛下。聰明睿智。天縱多能。向因萬機之餘。親考上元之曆。以授百職。以同萬方。而臣官任轉輸。兼司按察。若乃加正朔於四海。頒政教於明堂。陛下總其要而舉其大端。至於經時節。勸農桑。候豐凶。勤畜積。順時令。察姦非。則臣敢不守其職而行其小者。庶無失業。以答洪恩。

滁州謝上表慶曆五年十月

臣某言。臣伏蒙聖恩。授臣依前右正言知制誥知滁州軍州事。已於今月二十二日。赴上訖者。謗讒始作。大喧羣口。而可驚。誣罔終明。幸賴聖君之在上。列職尙切於清近。爲邦仍竊於安閑。祇荷恩榮。惟知感錄。臣某中謝。伏念

臣生而孤苦。少則賤貧。同母之親。惟存一妹。喪厥夫而無託。攜孤女以來歸。張氏此時。生纔七歲。臣媿無蓄。慈前知之。識不能逆料其長。大所爲。在人情難棄於路隅。緣臣妹遂養於私室。方今公私嫁娶。皆行姑舅婚姻。况嚴於臣宗。已隔再從。而張非已出。因謂無嫌。乃一作仍。未及笄。遽令出適。然其既嫁五六年後。相去數千里間。不幸其人自爲醜穢。臣之耳目不能接。思慮不能知。而言者及臣。誠爲非意。以至究窮於資產。固已吹析於毫毛。若以攻臣之人。惡臣之甚。苟罹織過。奚遑深文。蓋荷聖明之主張。得免羅織之冤枉。然臣自蒙睿獎。嘗列諫垣。論議多及於貴權。指目不勝於怨怒。若臣身不黜。則攻者不休。苟令讒巧之愈多。是速孤危於不保。必欲爲臣明辯。莫若付於獄官。必欲措臣少安。莫若置之閑處。使其脫風波而遠去。避陷阱之危機。雖臣善自爲謀。所欲不過如此。斯蓋尊號皇帝陛下。推天地之賜。廓日月之明。知臣幸逢主聖而敢危言。憫臣不顧身微而當衆怨。始終愛惜。委曲保全。臣雖木石之心。頑實知君父之恩厚。敢不虔遵明訓。上體寬仁。永堅不轉之心。更勵匪躬之節。

賀章獻明肅章懿二皇后祔廟表慶曆五年十月

臣脩言。伏觀十月九日赦書。章獻明肅皇后章懿皇后祔廟禮畢者。大孝發於宸衷。刑于四海。休氣蒸乎美澤。賚及萬方。華夏歡呼。人一作神。祇咸一作感。悅。臣某中賀。恭惟尊號皇帝陛下。自天生德。繼聖垂衣。率勤儉以在躬。推仁恩而浹物。動稽先訓。謙弗自尊。奉二后之慈靈。永懷罔極。詢百執之公議。所據有經。然後肅清廟以載嚴。由闕宮而升祔。上儀交舉。六慶咸均。孝思永奉於烝嘗。懿範有光於典策。臣守藩地近。一作遠。受國恩深。欣盛事之親逢。與蒼生而共樂。

賀祔廟禮畢進奉銀五百兩狀

右臣伏以廟容祔室。一人式奉於孝思。方物克庭。萬國率從於奔走。前件物堅剛挺質。粹美稱珍。勉修邦貢之儀。用罄臣忠之節。

謝賜慶曆六年曆日表

祇膺寵錫。伏積兢榮。臣某伏惟尊號皇帝陛下愛人育物。精意奉天。日用而百姓不知。聖德與四時合序。是以星辰順軌。日月清明。陰陽和。風雨節。恭己南面。授人以時。屬此歲端。大頌玉曆。臣職在守土。愧無他能。謹守詔條。其敢失墜。

謝賜慶曆七年曆日表

臣脩言。本州進奏院遞到詔書一道。賜臣慶曆七年曆日一本者。天序方周。王正肇建。凡爾守邦之吏。皆蒙頒曆之恩。匪以爲私。蓋遵彝典。臣某中謝。伏惟尊號皇帝陛下乾坤覆載。日月照臨。不言而四時行。有作而萬物覩。而乃考覽氣象。精窮天人。著爲玉曆之文。以叶明堂之政。舟車所至。正朔咸加。雖被謫以窮居。亦以時而受賜。臣敢不虔遵聖訓。順布民時。上副欲治之心。少逃曠官之責。一作俗。

慰申王薨表慶曆七年五月

臣某言。臣得進奏院狀報。五月二十三日。以皇叔申王德文薨。皇帝幸後苑舉哀。挂服者。伏以申王德文位崇王爵。地重宗藩。遽背明時。奄然殂謝。伏惟尊號皇帝陛下仁親九族。孝治萬方。成服發哀。恩隆禮備。臣忝居侍從。遠守詔條。不獲躬詣闕庭。以伸奠慰。臣無任哀感之至。

賀鴻慶宮成奉安三聖御容表慶曆七年七月

臣脩言。伏覩南京鴻慶宮成奉安三聖御容者。一人致孝。式表於奉先。三后在天。並垂於鴻祐。人靈交感。華夏歡呼。臣某中賀。伏惟尊號皇帝陛下以上聖之姿。撫重熙之運。親執玉幣。禮天地之神祇。時奉烝嘗。報祖宗之功德。乃眷別京之重。載崇原廟之儀。衣冠出遊。仰稽於故事。郡國嘗幸。俾得以奉祠。實隆廣孝之風。以著不刊之典。臣猥叨辭職。方守郡條。瞻盛禮以阻陪。效歡聲而徒切。

請加上騎都尉進封開國伯加食邑三百戶表慶曆七年十二月

訓辭深厚。恩典優隆。祇服以還。戰兢無錯。臣某中謝。伏念臣材非世用。行與時違。過蒙獎擢之私。忝居侍從之列。

坐尸厚祿。安處善邦。當見帝以親郊。莫陪嚴祀。洎受釐而均慶。亦被寵光。進爵賜勳。卽封加戶。併茲榮數。及迺無功。敢不返自省循。益思砥礪。上答乾坤之造。更堅犬馬之誠。

賀平貝州表慶曆八年閏正月

伏聞閏月一日攻下貝州。殺到妖賊王則者。盜孽竊興。人一作神。祇共忿。果憑睿筭。悉殄兇徒。臣某中冀。伏惟尊號皇帝陛下推仁育物。浸澤在人。常服一作克。儉以躬行。惟足兵而在念。至於多捐金幣。講好戎夷。務休戰爭。蓋惜士卒。德至深而莫報。恩既厚則生驕。敢肆妖狂。自干斧鉞。驅脅一作脅。士衆。閉守城闔。既違天而逆人。宜不攻而自破。而況聖神運略。將相協忘。不遺一人。咸卽大戮。悖慢者警而肅恪。一作恪肅。昏愚者知有誅夷。銷沮姦萌。震揚威令。臣幸忝郡寄。欣聞德音。

揚州謝上表慶曆八年二月

臣脩言。準樞密院遞到誥勅一道。伏蒙聖恩。授臣起居舍人。依前知制誥知揚州軍州事。已於今月二十二日赴任。訖者。貶所脫身。遽叨臨於督府。歲成無狀。仍敘進於官聯。被渥以優。撫心增懼。臣某中謝。伏念臣材非適用。行輒違時。徒知好古之勤。自勵匪躬之節。誤蒙獎拔。驟玷寵榮。小器易盈。固已宜於顛覆。盡言取禍。仍多結於怨仇。仰恃公朝。臣雖自信。在於物理。豈有不危。矧利口之中人。譬含沙之射影。謂時之衆嫉者易爲力。謂事之陰昧者易爲誣。上一一作幸。繫天聽之聰。終辨獄辭之濫。苟此寃之獲雪。雖永棄以猶甘。而況得善地以長人。享及親之厚祿。坐安優逸。未久歲時。亟就易於方州。仍陟遷於秩序。有以見聖君之意。未嘗忘言事之臣。孤拙獲全。忠善者皆當感勵。姦讒不效。傾邪者可使息心。非惟愚臣獨以爲幸。此蓋伏遇尊號皇帝陛下乾坤覆載。日月照臨。察人常務於究情。行賞必思於有勳。致茲恩典。施及懦庸。誓堅終始之心。少答生成之造。

潁州謝上表皇祐元年三月十三日

臣脩言。伏蒙聖恩。就差臣知潁州軍州事。臣已於三月十三日赴上訖者。規求安閑。坐享榮祿。雖大君之德。曲示

含容而爲臣之心。豈自邊處。臣某中謝。伏念臣材能淺薄。性識昏蒙。偶自弱齡。粗知學古。謂忠義可以事國。名節可以榮身。自蒙不次之恩。亦冀非常之效。然而進未有緘毫之益。已不容於怨仇。退未知補報之方。遽先罹於衰病。神與明而並耗。風乘氣以交攻。瞶瞶雖存。白黑纔辨。蓋積憂而自損。信處世之多危。伏蒙尊號皇帝陛下造化陶鈞。高明覆載。閱其孤拙。未卽棄捐。付以善邦。俾從私便。所冀療治有驗。瞻視復完。則及物之仁。荷更生之大賜。便身不廢。猶後效之可圖。

謝轉禮部郎中表 皇祐元年四月

臣某言。蒙恩授臣禮部郎中知制誥。依舊知潁州者。恩出非常。榮逾始望。人以臣爲寵。臣以喜爲憂。伏念臣自小無能。惟知嗜學。常慕古人而篤行。不思今世之難行。而自遭遇聖明。驟蒙獎拔。急於報國。遂欲忘軀。結怨仇者皆可畏之人。所違忤者悉當權之士。既將行己。又欲進身。惟二者之難兼。雖至愚而必達。況臣粗知用捨。頗識廉隅。故其自被讒誣。迨於降黜。嘗舉朝拂議。未嘗以寸牘而自明。及累歲謫居。不敢以半辭而自理。其後再經寬赦。移鎮要藩。曾未逾年。遽求小郡。蓋臣知難當之衆怒。尙未甘心。思苟免之善謀。惟宜退迹。則臣於榮進。豈敢僥求。此蓋皇帝陛下日月照臨。乾坤覆載。不忘舊物。曲軫睿慈。謂臣貶職之人。悉皆牽復。憫臣無名之罪。久未雪除。故推敘進之文。特示甄收之意。然臣近於去歲。早已改官。逮此便蕃。豈宜叨竊。欲固讓。則有嫌疑之避。欲遽受。則懷忝冒之慙。進退之間。凌兢失措。惟當盡節。上報深恩。

謝復龍圖閣直學士表 皇祐元年八月

臣脩言。今月十八日。樞密院遞到誥勅各一道。伏蒙聖恩授臣依前禮部郎中。充龍圖閣直學士。仍舊知潁州者。恩還舊職。事雪前誣。感極心驚。涕隨言出。臣某中謝。臣伏見前世材賢。一作賢材之士。身結主知。勳德之臣。功施王室。然尙或一遭謗毀。欲辨無由。少忤要權。其禍不測。顧如臣者。何足道哉。臣材不迨於中人。功無益於當世。用之未見其効。去之無足可思。矧罔極之譏。交與而並進。易危之迹。何恃而不顛。而聖心不忘。恩意特至。辨罔欺於

曖昧。沮仇嫉於衆多。雖暫居譴謫之中。而屢被陞遷之渥。今又特蒙甄錄。牽復寵名。以臣之愚。豈比前人而獨異。推其所幸。蓋由聖主之親逢。謂宜如何。可以論報。再念臣稟生孤拙。本乏藝能。徒因學古之勤。粗識事君之節。苟臨危效命。尙當不顧以奮身。況爲善無傷。何憚竭忠而報國。誓期盡瘁。少答高明。

南京謝上表 皇祐二年七月

臣某言。伏蒙聖恩。就差臣知應天府兼南京留守司事。臣已於今月二十四日赴上訖者。守宮鑰之謹嚴。敢忘夙夜。布政條之纖悉。上副憂勤。寄任非堪。兢營並集。臣某中謝。伏念臣賦才庸薄。稟數奇屯。毀譽交興。兩嘗過實。寵榮踰分。動輒招尤。念報效之未伸。敢不竭忠而盡瘁。困風波之可畏。則思遠去以深藏。迨此六年。外更三守。學偷安而杜口。負素志以媿心。朽質易衰。已凋零於齒髮。良時難得。尙希慕於功名。豈謂皇慈。未捐舊物。擢從支郡。委以名都。惟此別京。舊當孔道。簿領少勤於職事。廚傳取悅於路人。苟循俗吏之所爲。雖能免過。非有古人之大節。未足報君。

謝明堂覃恩轉官加勳表 皇祐一年十月

臣某言。合月十三日進奏院遞到誥勅各一道。伏蒙聖恩。授臣尙書吏部郎中。加輕車都尉。依前龍圖閣直學士。仍舊知應天府兼南京留守司事。及放朝謝者。天地號令。風雷鼓行。一氣所均。萬物咸被。遂容僥倖。亦與襄升。臣某中謝。伏念臣材不逮人。識非慮遠。徒有事君之節。未知報國之方。冒寵貪榮。已踰其量。見利臨得。曾不知慚。比者伏遇尊號皇帝陛下。堯舜聰明。禹湯勤儉。脩前王之曠典。述先志以繼成。昭致精禋。躬臨路寢。膺受上天之多福。推與萬方而不私。臣於此時。恨以官守。謹儀制禮。不預議郎博士之流。助祭陪祠。不在諸侯方物之列。既乏一言之獻。又無執事之勞。徒隨翟闈。共享餘賜。普天率土。難異衆以獨辭。踣厚踟高。但撫躬而無措。

〔辭召試知制誥劄子〕干進。一作而進。〔辭召試知制誥狀〕不以自明。不字疑。〔辭免第二狀〕所陳。一作累所陳。獨專。一作專獨。〔謝知制誥表〕未少。一作不少。玉色。一作顏色。聖主。一作明主。〔滁州謝上表〕乃未及

筓。一作乃當未筓。尊號。此上一有伏遇二字。〔賀鵬慶宮成奉安表〕玉幣。一作圭幣。〔賀平貝州表〕王則。此下一有等字。〔揚州謝上表〕以優。一作已優。自勵。一作每勵。忘言。一作廢言。孤拙獲全。〔至〕爲幸。〔二十九字〕一作危拙獲全。爲尊者皆當感激。罔敢不効。好讒者由是沮消。豈特臣愚。獨蒙其幸。〔潁州謝上表〕昏蒙。一作昏愚。〔謝轉禮部郎中表〕一作臣某言。樞密院遷到勅告。伏蒙聖恩。授臣尚書禮部郎中依前知制誥知潁州者。自小。一作自少。篤行。一作篤信。不敢以。以一作有。謂臣貶職。謂字下一有後字。憫臣。此上一有而字。〔謝復龍圖閣直學士表〕曖昧。曖。元作諱。尙當一作尙恩。〔南京謝上表〕困風波。困。一作囚。

卷一

謝賜對衣狀至和元年六月

右臣伏以粹然玉色。方覲於清光。賁以身章。遽蒙於寵賜。授受之際。兢懼交相。伏念臣材庸及中。器非周用。盡光華之在且。荷榮祿以逾涯。非惟罪謗之多。羅實亦禍罰之並至。苟存遺體。僅續餘生。敢謂伏蒙尊號皇帝陛下。覆燾之恩。幽微必及。召從廬次。復以官聯。當陛見之云初。陳筓衣而有煥。飾躬增耀。愈彰不稱之譏。處物雖愚。猶識謝生之所。臣無任。

辭翰林學士奏至和元年九月

臣今日準閣門告報。蒙恩除臣翰林學士。所降勅告。臣未敢祇受。竊以內制之職。選用非輕。臣以庸虛。繆塵侍從。歲月雖久。能效無聞。居外任不歷煩難。在朝廷未有補益。見居學士之職。已甚厚顏。豈敢更希榮進。況臣屯蹇之迹。憂患所侵。齒髮凋殘。心志衰耗。嚮侍老母。久纏疾恙。尋丁憂制。僅有餘生。累歲以來。學業荒廢。詔誥之任。尤非所當。欲望聖慈。察臣衰拙。所有恩命。特賜褻停。臣無任。

謝宣召入翰林狀

使車入里。君命在門。閭巷驚傳。豈識朝廷之故事。搢紳竦歎。以爲儒者之至榮。在臣之愚。何以堪此。竊以文章一作詞之任。自古非輕。待遇寵榮。至有私人之目。詢謀獻納。因加內相之名。恩既異於常倫。人愈難於稱職。伏念臣器非宏遠。識匪該明。學不通古今之宜。材不識方圓之用。久叨塵於侍從。曾莫著於勞能。而自出守外藩。近遭家禍。苟存餘喘。復齒周行。風波流落者十年。天日再瞻於雙闕。進對之際。已蕭颯於霜毛。慰勞有加。賜憫憐於玉色。形神若此。志意可知。身已分於早衰。心敢萌於希進。加以羈危之迹。仇嫉交攻。進退動繫於羣言。論議多煩於睿聽。雖覆載之造。每賜保全。而孤蹇偷安。常思引去。敢謂伏蒙。每號皇帝陛下。俯憐舊物。曲軫宸慈。因內署之闕員。俾備官而承乏。臣敢不勉尋舊學。益勵前脩。感遺簪未棄之仁。竭駑馬已疲之力。庶伸薄效。少答鴻恩。

謝對衣金帶鞍轡馬狀同前

右臣伏蒙聖慈。以臣入院。特賜衣一對。金帶一條。金鍍銀鞍轡馬一疋者。禁林促召。彌峻於近班。慈澤逾涯。復叨於蕃錫。退循昧陋。曷稱暉榮。伏念臣素乏藝文。久塵清近。神都繁浩。常懼於曠官。內署凝嚴。遽叨於廁職。便蕃曲被。兢慄方深。豈謂載厚宸慈。式垂寵賚。兼金錫帶。榮踰廊落之名。在笥頒衣。媿甚曳婁之刺。輟以內閑之駿。飾精寶校之光。俯耀微軀。仰慚殊渥。庸何醜補。但誓糜捐。臣無任。

乞洪州劉子嘉祐二年

臣去冬曾有奏陳。乞差知洪州一次。尋以差入貢院。無由再述懇私。伏念臣本以庸愚。叨塵恩寵。一入禁署。迨今三年。進無補於朝廷。退自迫於衰病。眼目昏暗。腳膝行步頗艱。右臂疼痛。舉動費力。雖翰苑事無繁劇。聖恩曲賜優容。然非養病尸居之地。兼臣鄉里在吉州。昨於丁憂持服時。歸葬亡母。荒迷之中。庶事未備。本期服闋還朝。上告聖慈。乞一近鄉州郡。貴得俸祿。因便營緝。而自叨禁職。荏苒歲時。貪寵忘親。此又人子之責也。所以夙夜彷徨。不能自止。欲望聖慈。憫臣衰朽。察臣懇迫。特許差知洪州一次。取進止。

辭侍讀學士劉子嘉祐三年三月

臣準閣門告報。伏蒙聖恩授臣兼侍讀學士。臣伏見侍讀之職。最爲清近。自祖宗以來。尤所慎選。居其職者。常不過一兩人。今經筵之臣一十四人。而侍讀十人。可謂多矣。臣以愚繆。忝廁翰林。又充史職。太常禮儀。秘閣秘書。省尙書禮部。刊修唐書。然則在臣。不謂無兼職。而經筵又不闕人。忽沐聖慈。特此除授。蓋以近年學士相承。多兼此職。朝廷以爲成例。不惜推恩。比來外人議者。皆云。講筵侍從。人多無坐處矣。每見有除此職者。則云。學士俸薄。朝廷與添請俸。官以人輕。一至於此。欲乞罷臣此命。不使聖朝慎選之清職。遂同例授之冗員。況臣材識淺薄。自少以來。粗習辭章。過蒙進擢。俸塵禁署。中年衰病。常憂廢職。至於講說經義。博聞彊記。矧復非臣所長。今者舊之臣。經術之士。並侍講讀者。足以備顧問。承清光。欲望聖慈。矜臣不材。自知俸免冒榮之誥。所有告勅。不敢祇受。取進止。

再辭侍讀學士狀嘉祐三年三月

右臣準中書劄子。以臣辭免侍讀學士恩命。奉聖旨。不許辭讓者。伏念臣猥以庸虛。過蒙獎擢。禁署爲一時清選。既已忝竊經筵。況近例多兼。何必辭讓。蓋以臣身見兼八職。侍讀已有十人。爲朝廷惜清職。遂爲冗員。況講席不添人。未至闕事。所以敢陳警說。乞免冒榮。臣伏見國家近年以來。恩濫官冗。議者但知冗官之弊。不思致弊之因。蓋由凡所推恩。便爲成例。在上者稍欲裁減。則恐人心之不足。在下者既皆習慣。因謂所得爲當然。積少成多。有加無損。遂至不勝其弊。莫知所以裁之。中外之臣。無有賢愚。共知患此。而臣爲陛下學士。職號論思。豈有自親時弊。心知可患。無所獻納。而又自身蹈之。今既已陳述。若又不自踐言。則貪榮冒寵。不止尋常之責。而虛辭飾讓。又爲矯僞之人。此臣所以恐迫惶惑。不自知止也。伏望聖慈。矜臣至懇。察臣狂言。許寢新恩。俾安常分。謹具狀奏聞。伏候勅旨。

辭開封府劄子嘉祐三年六月

臣伏聞內出誥勅各一道。付閣門。除臣兼龍圖閣學士。權知開封府。臣以庸拙。久塵侍從。初無勞效。以伸補報。日

夕循省常愧心顏。今者曲蒙聖慈。誤加選用。豈可苟避繁劇。輒希辭免。蓋臣有不得已者。須至縷陳。臣自前歲已來。累有奏列。一作狀。乞一外任差遣。蓋以臣久患目疾。年齒漸衰。昏暗愈甚。又自今年春末。忽得風眩。昨於韓絳入學士院勅設日。衆坐之中。遽然昏眩。自後往往發動。緣臣所修唐書。已見次第。所以盤桓。欲俟書成。便乞補外。豈期聖造。委以治煩。臣素以文辭專學。治民臨政。既非所長。加以早衰多病。精力不彊。竊慮隳官敗事。上誤聖知。兼所修唐書。不過三五月。可以畢手。置局多年。官吏拘留。糜耗供給。今已垂成。若別差人。轉成稽滯。只委臣了。則恐無暇及之。欲望聖慈。矜臣衰病。才非所長。欲乞別選材能。許臣且仍舊職。候唐書成日。乞一外任差遣。以養衰殘。今取進止。

乞洪州第二劄子嘉祐四年正月

臣輒有愚懇。上干聖聽。出於至誠。不敢緣飾。臣本以愚懦。別無材能。過蒙恩私。列在侍從。初無補報之效。每以尸素爲慚。昨者忽被選差。俾權京尹。臣雖知材力淺薄。衰病侵陵。當此浩穰。實難辦濟。直以忝廁翰苑。迨今數年。所職清閑。過享優逸。一旦遽蒙煩使。不可再辭。亦欲勉彊年歲之間。少陳筋力之效。苟無曠敗。乞一外州。不意眼目舊疾。遽然發動。蓋自供職以來。且且常於燈燭下看讀文字及簽書發遣。自早至夜。率以爲常。全藉眼力。而臣舊患已及十年。兩目眊然。中外具見。近一兩月來。暗昏疼痛。屢在假告。不無廢事。人雖未責。臣豈自安。臣自前累。曾陳乞江西差遣一任。欲乞檢會。臣前後陳乞。依蔡襄例。除臣洪州一次。俾解繁劇。以養衰殘。伏望聖慈。特賜矜允。今取進止。

乞洪州第三狀

右臣近罄懇私。自陳衰病。願罷權尹。乞一外州。伏蒙聖恩。降詔不允。臣以庸繆。過叨獎擢。不能陳力。輒欲辭勞。當被刑誅。敢期詔諭。理宜祇惕明訓。勉勵疲鷲。而敢再干天聰。固自愚執者。蓋臣有不得已也。臣舊患兩目。於今年。近日以來。發作一作動。尤甚。眊淚浸漚。睛瞳眊昏。視物稍多。其痛如割。欲頻請假告。則浩穰之地。豈自遑安。欲

竭力枝梧。則疾患內攻。有難勉彊。夙夜憂畏。不知所爲。欲望聖慈憫臣衰殘。察臣愚拙。許解繁劇。假一遠外之州。俾之待罪。臣無任瞻天祈恩激切之至。謹具狀陳乞。伏候勅旨。

乞洪州第四劄子

臣近兩曾陳乞。差知洪州一任。未蒙恩許。蓋以臣衰病不支。難當任使。素心所切。苟欲便私。非敢自圖外州。以就優逸。臣年雖五十三歲。鬢鬢皓然。兩目昏暗。自丁憂服闋。便患腳膝。近又風氣攻注。左臂疼痛。舉動艱難。一身四肢。不病者有幾。以此貪冒榮祿。兼處劇繁。實知難濟。矧自權行府事以來。三致臺諫上言。兩煩朝廷起獄。其它碌碌常事。亦無分寸可稱。蓋其資材本自庸虛。加以精神日漸耗竭。處之清職。則論議謀猷。無一可取。擢以煩使。又心力疲憊。自訴不能。上賴聖慈憐憫。雖未欲遽棄於外。而臣自處。實所難安。伏見侍從之班。交相出入。昨呂溱劉敞。並請補外。不三數歲。今悉召歸。況如臣者。留之無所補。去之無所惜者哉。欲望聖慈矜臣此志。乞一外任差遣。得以養理衰殘。誓於餘年。少圖報效。今取進止。

辭轉給事中劄子嘉祐四年二月

臣近曾陳乞外任差遣。伏蒙聖慈許臣解罷府事。兼授臣給事中。臣本以庸虛。謾蒙獎任。不能陳力。況未及期。遽以衰病。自求罷去。理當黜責。以勵不才。豈宜非時濫被恩賞。況臣權府之初。已蒙加以兼職。到今才及半年有餘。不因朝廷別有差使。只是自以疾病求罷。豈可又轉一官。雖聖恩優厚。過寵衰殘。而臣自揣量。無容遷受。所有恩命。乞賜停寢。只許令臣歸院供職。所冀少安疲病。今取進止。

再辭轉給事中劄子同前

臣近準閣門告報。蒙恩授臣給事中。臣尋曾懇懇。乞賜寢停。今準中書劄子。奉聖旨不許辭讓。便令授告勅者。臣本庸材。蒙陛下擢在翰苑。言語侍從。既無所納。以伸報效。任以煩使。又自陳疲病。訴以不能。然則如臣久冒寵榮。果堪何用。上賴聖君優容。未加黜責。豈可授命之日。已蒙加職。不久罷去。又復轉官。此臣所以慚懼徊徨。不敢即

授也。臣竊見前知府呂公弼差知益州。授樞密直學士。及公弼辭免不行。徒領羣牧。遂卻只依舊充龍圖閣直學士。王素蔡襄並因方面之寄。乃遷職。是則罷府供職京師者。不當別有遷轉。此近例也。臣非敢飾僞。上煩聖聰。直以恩寵頻併。理當辭避。欲望聖慈察臣無所堪用。矜臣能自揣量。俾獲新恩。免貽羣議。今取進止。

舉呂公著自代狀同前

臣伏見司封員外郎崇文院檢討呂公著出自相門。躬履儒行。學贍文富。器深識遠。而靜默寡欲。有古君子之風。用之朝廷。可抑浮俗。置在左右。必爲名臣。非惟臣所不如。實當今難得之士。臣今舉以自代。

進新修唐書表嘉祐五年七月戊戌爲提舉編修會公亮作

臣公亮言。竊惟唐有天下。幾三百年。其君臣行事之始終。所以治亂興衰之迹。與其典章制度之英。宜其粲然著在簡冊。而紀次無法。詳略失中。文采不明。事實零落。蓋百有五十年。然後得以發揮幽昧。補緝闕亡。黜正僞謬。克備一家之史。以爲萬代之傳。成之至難。理若有待。臣某中謝。伏惟尊號皇帝陛下有虞舜之智。而好問。躬大禹之聖。而克勤。天下平和。民物安樂。而猶垂心積精。以求治要。日與鴻生舊學。講誦六經。考覽前古。以謂商周以來。爲國長久。惟漢與唐。不幸接乎五代。衰世之士。氣力卑弱。言淺意陋。不足以起其文。而使明君賢臣。儻功偉烈。與夫昏虐賊亂。禍根罪首。皆不足暴其善惡。以動人耳目。誠不可以垂勸戒。示久遠。甚可歎也。乃因邇臣之有言。適契上心之所閱。於是刊脩官翰林學士臣歐陽修。端明殿學士臣宋祁。與編修官知制誥臣范鎮。臣王疇。集賢校理臣宋敏求。祕書丞臣呂夏卿。著作佐郎臣劉敞。叟等。並膺儒學之選。悉發祕府之藏。俾之討論。共加刪定。凡十有七年。成二百二十五卷。其事則增於前。其文則省於舊。至於名篇著目。有革有因。立傳紀實。或增或損。義類凡例。皆有據依。纖悉綱條。具載別錄。臣公亮典司事領。徒費日月。誠不足以成大典。稱明詔。無任慚懼。戰汗屏營之至。

辭轉禮部侍郎劄子嘉祐五年七月庚子

臣準閣門告報。蒙恩除臣禮部侍郎。令臣授告勅者。臣伏思聖恩所及。必以臣近進唐書了畢。凡與脩書官。並均